



DISSERTATIO  
INAUGURALIS  
MEDICO-CHIRURGICA,  
DE  
ANEURYSMATE

QUAM  
ADNEXIS THESISBUS MEDICO-PRACTICIS  
ADNUENTE INCLYTA  
FACULTATE MEDICA  
IN  
ANTIQUISSIMA AC CELEBERRIMA  
UNIVERSITATE VINDOBONENSI, UT SUPRE-  
MUM DOCTORATUS GRADUM, SUMMOSQUE  
IN MEDICINA HONORES, AC PRIVILE-  
GIA RITE, AC LEGITIME CON-  
SEQUERETUR.

PUBLICÆ OMNIUM DISQUISITIONI  
SUBJICIT

THADDÆUS STRIBEL,

STYRUS MARBURGENSIS

A.A.L.L. ET PHILOSOPHIÆ DOCTOR

DISPUTABITUR

IN UNIVERSITATIS PALATIO.

DIE MENSIS *Aprilis* ANNI MDCCLXXXIII.



V I E N N Æ,

TYPIS A BAUMEISTERIANIS.



P R Æ N O B I L I

GENEROSO AC INTEGERRIMO

DOMINO DOMINO

LEOPOLDO JOSEPHO

S E M B L E R

CÆSAREO REGIO

URBIS VINDOBONENSIS

ACTORUM PUBLICORUM

CONSIGNATORI


FAUTORI, AC PATRONO OPTIMO

ÆTERNA MEMORIA VENERANDO

I N

PERPETUUM GRATI ANIMI

MONUMENTUM.



# PRÆNOBILIS

A C

## GENEROSE DOMINE!

**I**llucescit tandem expectata diu, exoptataque illa dies, qua, quod dudum, imo pectore reconditum voveram, opere ipso exequendi mihi datur potestas. Et sane nemini, præter TE, majori jure primos hosce meos in Medicina labores, atque conatus obferre valeo. Tanta enim est TUA in me benevolentia, tantusque beneficiorum, quibus me cumulasti, & adhucdum in hunc usque diem me cumulas, numerus, ut sincerus, me iisdem vivis adumbrandis coloribus non esse, palam contester. Majora enim essent, longeque plura laudum TUARUM encomia, quam, ut ab exiguo adeo, qualem me sentio, encomiastè pro dignitate deprædicarentur; &, etiamsi valerem, vetaret

TUA omnibus nota modestia, præterquam,  
quod jure verear, ne calamus meus laudes  
TUAS obscuret magis, quam extollat. Pa-  
tere igitur, Vir integerrime! ut hæc pā-  
gellas NOMINI TUO sacras faciam, eas-  
que serena fronte respice, favoribusque  
TUIS ulterioribus beare non dedigneris.

NOMINIS TUI

Ad cineres usque cultorem  
Thaddæum Stribel.



PRÆFATIO  
AD  
LECTOREM

---

En! sisto tibi B. L. dissertationem inauguralem de *Aneurysmate*. Materiem, a nemine medicinæ candidatorum, quantum scio, hucdum pertractatam, in qua tamen multi Cl. Viri dudum ante me desudarunt, ex quorum scriptis materiem, ordinemque selegi, excerpti, conscripsi. Quid enim novi, de quo non centies scriptum, rescriptumque sit, initians tractet medicus? Notum enim perspectumque mihi est; *quam sit mihi curta suppellex; Et: quid ferre recusent, quid valeant humeri; præterquam, quod, non omnis fert omnia tellus.*



Si tamen inde quandam Medicinæ præcipue Tyrones hauserint utilitatem, erit, cur mihi, me scopum adtigisse meum, summo opere gratuler. Has igitur paginas in usum, fructumque tuum converte, & vale.





## D E

# ANEURYSMATE.

---

**A**neurysma tumor est, plus, minusve pulsans, corde, vel arteriis in aliquo sui loco dilatatis, vel eorundem soluta continuitate natus.

Definitio.

Lancis. l. de aneur. prop. 4. in generali aneurysinatis definitione tumoris mentionem non facit, nisi, ubi species illius distinguit, ac si tumor non esset de essentia aneurysmatis. Et prop. 5. clarius adhuc definit: *Non omne aneurysma sub tumorum genere deprehendi, cum ea, quæ compressis arteriis fiunt, sub genus hæmorrhagiarum cadant.* Sed sic non aliter est, ac si nulla arteriæ dilatatio sub hoc ge-

nere poneretur. Verum neque tunc aneurysinatis nomen meretur, nisi tumor, in cellulofam effuso sanguine, adfuerit. Hinc in propatulo est: quare *simplex arteriæ vulnus*, quia id sine tumore esse potest, definitionem aneurysmatis alterare non debeat, cum tale vulnus simplex nullo modo aneurysma dicendum sit, ut advertit idem Lanc. 1. 2. prop. 7. ubi, notandum esse monet: sectionem arteriæ, per quam sanguis libere, & extra corpus fluit, non esse verum aneurysma, cum hoc malum reducatur ad genus vulnerum, & hæmorrhagiarum. Nihilominus tamen, quia ex hujusmodi incisione frequentissime tumor oritur, qui aneurysma dicitur, non immerito &c. V. Lanc. 1. & prop. paulo antea c.

**Divisio prima.** Solet autem communiter aneurysma dividi in verum, & spurium.

**Verum.** Verum aneurysma dilatationem arteriæ dicit, & est tumor durus, pulsans, ut plurimum cuti concolor, major, vel minor, qui, pressus, retrocedit, & pressione remittente, denuo redit.

**Spurium.** Aneurysma spurium est, quod vulnus completum arteriæ subponit, & est tumor amplius, ut plurimum late sese diffundit.

fundens, obscure pulsans, rubro, purpureo, vel livido colore defoedatam cutim exhibens, qui, pressus, non retrocedit, sed strepitum, & murmur edit, a sanguine, ex arteria læsa in cellulofam effuso, natum. Hæc distinctio aneurysmatum consuetæ fuit chirurgis.

Apud Hippocratem quidem aneurys- Divisio V. V.  
matis nulla fit mentio.

Galenus vero, & post illum, alii plures illius meminerunt. Hinc utramque illius speciem jam cognoverunt quidem veteres, sed nomine proprio singulas non distinxerunt. Sic Gal. I. de tum. scribit: *Ore in arteria facto, affectio aneurysma vocatur. Fit autem, continuat ille, vulnerata ea, cum ad cicatricem devenerit, quæ ei adjacet, cute. Manet vero arteriæ vulnus, ea, neque conglutinata, nec ad cicatricem perducta, neque a carne obstructa. Cujus affectio cognoscitur, dum pulsus, quem arteria fecit, fit. Sed etiam, cum premitur, delitescit omnis tumor, recurrente in arteriam substantia, quæ eum efficit. Vulneratâ aneurysmatica arteria ejaculatur sanguinem ita, ut vix contineri possit. Atque, ubi, quam ob rationem fiat, dixisset, profequitur: redditur multo latius, majusque aneu-*

Galen.

*aneurysma, ni quis grumus ingenitus ex aneurysmate siderationem faciat. Porro de currat. per sangu. miss. c. 21. sic loquitur: Verum propter difficilem arteriæ in fluxu compressionem arterias medici incidere nequeunt, quippe, cum, si quis, in secunda forte vena, arteriam vulneret, ægre statim sanguinis eruptio compefcitur; at, ubi res optime cedit, ad cicatricem aneurysma reductum, divisum, tamen aneurysma existit.*

Ex his Galeni locis videtur quidem, cum tantum aneurysma spurium, quod vulnerata, & discissa arteria eveniat, cognovisse; tamen, si signa, quibus cognoscatur aneurysma, & tumor aneurysmaticus, spectentur, nempe: *cum pulsare, pressum, retrocedere, & evanescere, & vulneratum, sanguinem fundere, & iterum: tumorem aneurysmaticum interdum latius diffundi, dum nempe grumus in aneurysmate ingenitus est, evidens fit: cum utrumque, & verum, & spurium aneurysma vidisse, licet naturam eorum non adeo explanaverit, & utrumque inter se non distinxerit.*

In Finit. Med. Gal. adscriptis melius hæc adhuc dilucidantur: *Aneurysma, ait, id est, dilatatio, venosi vasculi relaxatio est,*  
aut

aut spirituosæ materiæ dispersio sub cute. Notandum autem hic est: Vasa, sanguinem vehentia, venosa dicta fuisse vel maxime; ut igitur, ubi de vase venoso hic loquitur Gal. vas arteriosum intelligi debeat.

Paul. Æginetta, aneurysma unum cum Paul. Ægin.  
 apertura vasculorum arteriosorum, aliud vero  
 ruptione fieri, scribit. Et patet ex symptomatibus, & curandi ratione: prius, nostrum spurium, posterius nostrum verum fuisse.

Ipse Goræus in definit. Med. confusam quidem dat aneurysmatis definitionem; ast in ejus descriptione sat clare duas species distinguit: quarum una: digitis cedentem, rotundum, altera: durior, & tantum cum strepitu, cedentem, & prolixum apparentem tumorem exhibet. Goræi.

Aëtius longe clarius de aneurysmate loquitur: vasorum dilatationem, ait: græci *ἀνεύρυσμα* vocant; Notæ illius sunt: tumor, parvus, vel magnus, concolor cuti, citra dolorem, ad tactu mollem, spongiosam laxitatem præsefert, & ita ad digitorum pressionem cedit, ut propemodum evanescere videatur. Verum, amotis digitis, citissime revertitur. Quod in vero aneurysmate, & in reliquis, Aëtii.

liquis, quæ sine vulnere fiunt, præcipue videre datur; Verum, continuat ille, ubi arteriæ vulnus præcessit, & deorsum coalescente cute, vasorum dilatatio accessit, tumor non similiter mollis.

Ex quibus locis patet: V. V. duas aneurysmatis species, non nomine quidem, sed symptomatibus diversas, distinxisse. Quapropter mirari oportet, Freünd. in Hist. Med. unam aneurysmatis speciem ex V. V. scriptis expunxisse, quarum tamen utraque satis inde intelligitur.

Divisio R. R. Lancis. qui pulchrum certe de aneur. nobis tractatum reliquit, non communi sensu in divisione aneurysmatis procedit, quod monere oportet, ne legendo A. A. quibus methodus illa præ aliis præplacet, confusionem incurramus. Ille, Lanc. nempe: non ex diversitate symptomatum, sed ex diversitate rationis, & causæ, a qua aneurysma producat, illud in legitimum, & spurium divisit.

Legitimum. Legitimum aneurysma illud dicit: quod fit, dum arteria, a quacunque causâ, ita debilitata est, ut ordinarium sanguinis moti impetum ferre non possit, quin, vel dilatetur, vel rumpatur plane.

Spur.



*Spurium* autem appellat, quod non pen- Spurium.  
det a debilitate arteriæ præexsistente in illa,  
sed ab impetu sanguinis, ultra naturalem au-  
cto, quo naturalis arteriæ resistentia ita vin-  
citur, ut, vel dilatationem, vel rupturam  
experiatur.

Divisio hæec notari meretur, quia  
quælibet harum specierum verum, & spu-  
rium includit, communiter dictum, pro  
ratione nempe intensitatis causæ, in arte-  
ria ipsa, vel in motu sanguinis positæ,  
dilatantis solum, vel plane rumpentis ar-  
teriam.

Verum enim vero cum in ordine ad  
diagnosin, prognosin, & curationem plu-  
rimum interlit, aneurysma aspectu exter-  
no potius, quam per causas, quæ nos  
sæpe latent, distinguere, ideo hanc Lanc.  
divisionem aneurysmatis, utpote hac ex  
causa aliis longe inferiorem, sequi non  
oportet.

Alia aneurysmatis divisio est in *exter-* Divisio 2da.  
*num*, & *internum*.

*Externum* est, quod in parte corpo- Externum.  
*ris externa*: *internum*, quod in interna Internum.  
obtinet,

Estque.

Subdivisio  
Interni, in  
cordis & ar-  
teriae.

Estque internum iterum vel aneurysma cordis, vel aneurysma arteriae. Quippe: dum partes essentiales cordis, vel partes, ad illud pertinentes, dilatantur, etiam aneurysma dixerunt.

Apud V. V. divisio aneurysmatis in internum, & externum non obvenit; interim etiam aneurysma illud ipsis notum fuisse non videtur, donec sæculo 16. Vesal. primus tumorem, parietes thoracis elevantem, & pulsantem pro dilatatione arteriae habuerit, negantibus id Medicis, donec cadaveris apertura id docuisset.

Verum argumentis ista omnia demonstravit Morgagni in 1. de sed. & caus. morb. per Anat. deteg. epist. 17. cujus rei rationem dat, quod in animalibus, quæ antiquis temporibus ad anatomen ut plurimum adhibita fuere, aneurysmata interna non adeo sint frequentia; quod inde dependere autumat Albertinus comm. Acad. Bonon. tom. 1. quod animalia animi affectibus non ita ac homines violenter moveantur, unde quidem non infrequens aneurysmatum internorum in hominibus origo est. Plura id confirmantia exempla habentur apud Dionys. & Harv. Apud hunc quidem ab indignatione suppressa auriculæ dextræ,  
&



& cordis aneurysmata orta fuisse leguntur. Nec mirum, si, quid animi affectus in homine possint, recogitetur.

An autem illa, quæ communiter viget, aneurysmatis in verum, & spurium divisio ad dandam de aneurysmate vero, & spurio distinctam ideam sufficit? Postquam variis hanc in rem observatis ars ditior facta est, omnino manca esse videtur. Habemus enim primo: casus, in quibus arteria in toto suo ambitu præternaturaliter dilatata fuit; habemus alios casus, in quibus tantum in uno suæ circumferentiæ loco in tumorem protuberabat, & ipsa arteriæ substantia saccum aneurysmaticum formabat. Frequentissimi hi sunt.

Sed, præter plures alios, Heister. Divisio Heisteri. in definit. anat. etiam aneurysmatis meminit duplicis speciei. In utraque specie præternaturalis arteriæ dilatatio obvenit.

At, sunt secundo alii casus, in quibus, divisis omnibus arteriæ membranis, arteria, perfecto hians vulnere, sanguinem in vicinam cellulosam effundit, unde tumor nascitur lividus, prolixus, non adeo se reprimi patiens, vix pulsans.

Monroi.

Verum tertio proponit Cl. Monroo in Act. Edimb. t. 2. num. 16. aliam aneurysmatis speciem, quæ non fit præternaturaliter dilatata arteria, sed, illa, perfecto vulnere divisa, nec tamen cum tumore prolixo, a sanguine in cellulofam effuso, sed cum tumore pulsante, retrocedente, dum premitur, omnibusque aneurysmatis veri symptomatibus. Sequenti autem modo id fieri credit Cl. Monroo, quando, inquit, vulnus arteriæ parvum est, & sanguis per vulnus, integre fere clausum, exire non potest, coagulatur proximus vulneri, per quod effluit, quo coagulo sanguis ulterius impeditur, ne in cellulofam se effundat, quod coagulum brevi in lamellatam mutatur membranam, quam ex sanguine conquassato nasci, ostendi. Quodsi, continuat, membranofus hic concretus sanguis, inclusus, e vulnere effluere impeditus fuerit, affectus in hoc casu similis erit rotundo cystico tumori, qui, commotus, per vicinas arterias, vel per sanguinem, foramen apertum urgentem, arteriam iterato motu pulsanter exhibebit, donec, vel ob magnitudinem tumoris, vel ob sanguinis concreti quantitatem minuatur, qui demum tumor, dummodo non magna sanguinis copia adfuerit, pressus, retrocedit, sanguine fluido adhuc, per arteriæ foramen intrante. Continetur

netur in hac specie sanguis in sacco quodam, sed non arterioso; arteria enim non dilatata est, sed discissa.

Analogiam hujus rationem dat Kunter. in Act. Med. Lond. t. 1. num. 26. celeberr. hic medicus speciem aneurysmatis spurii constituit, quod omnibus notis vero esset simile, & nonnisi diligenti sectione, & nota causa ab eo distinguendum, in hoc tamen ab illo diversum, quod saccus, in quo sanguis continetur, non sit arteriosus, sed factus ex cellulosa, arterias circumdante, quæ per sanguinem, ex vulnerata arteria effluentem, compressa, facile in similem firmam membranam concrevit, coagulo per sanguinem cellulis illis inducto. Similia aneurysmata utique veris adnumerari non possunt, quia arteria dilatata non est, sed perfecto vulnere divisa. Sed neque spurii etiam adnumerari possunt, quia symptomata alia illa concomitantur, quam quidem spuria comitari solent.

Quapropter, ut ordinatam aneurysmatum divisionem habeamus, sequentem Nostri tertia  
verior divi-  
sio. rationem potius inire præplacet: Itaque aneurysma, quale definivimus: esse tumorem, plus, minusve pulsantem, arteria,

aut corde dilatato, aut ejusdem soluta  
continuitate, natum, communiter distin-  
guitur in aneurysma cordis, & arteriarum.

Divisio      Aneurysma vero arteriarum distinguitur:  
aneurysma-      I. In aneurysma cylindroides arteriæ. II. In  
tis arteria-      aneurysma cysticum arteriosum. III. In aneu-  
rum,              risma cysticum spurium. IV. In aneurysma  
                     ecchymoticum. V. In aneurysma venosum.

Aneurysma      Aneurysma cordis dicitur præternatura-  
cordis.              lis ventriculi unius, vel amborum, aut  
                     auricularum cordis dilatatio. Plurima etfi  
Sedes.              hujusmodi aneurysmatum prostant exem-  
                     pla; frequentissime tamen in ventriculo  
                     cordis dextro observantur, cum is fini-  
                     stro debiliior sit, & facilius dilatabilis.  
                     Frequentissime etiam in auriculis, & sinu-  
                     bus observatur, ut ex sectionibus cada-  
                     verum constare prop. 25. affirmat Lanc.  
Ratio.              Cujus ratio in laxiori, & minus resistente  
                     dictarum partium structura posita est.

Cylindroi-      Aneurysma cylindroides arteriæ dicitur,  
des arteriæ.      quando arteria in tota sua circumferentia  
                     præternaturaliter dilatata est. Aneurys-  
                     ma hoc in externis arteriis raro observa-  
                     tur, ast in internis, quibus major liber-  
                     tas est, ut in aorta, in carotidibus, fre-  
                     quentius observatur. Quinque talia ex-  
                    empla

empla l. antea c. adducit Kunter. unicum  
in arteria poplitea refert Cl. de Haen.  
Rat. Med. tom. 5.

*Aneurysma cysticum arteriosum.* Aneu-Cysticum.  
ryfma tale des Sauvages aptissime inter tu-  
mores cysticos reponit, quia ponit: san-  
guinem hæere in facto quodam membra-  
naceo sacco, ex arteria dilatata nato.  
Quod si faccus aneurysmaticus ex dilatata  
in aliquo sui latere arteria constet, &  
formet aneurysma, cysticum arteriosum id  
dicendum crit. Similium aneurysmatum  
tum interne, tum externe natorum exem-  
pla plura habentur. Huic speciei optime  
quadrat aneurysmatum a des Sauvages da-  
ta definitio, nempe, quod sit: *Cystis,*  
*cruore plena, ab arteriæ alterutra tunica di-*  
*latata.*

Sedes.

*Aneurysma cysticum spurium* dicendum  
est illud, quod constituitur sacco mem-  
branaceo, sanguinem coërente, qui ta-  
men faccus non a dilatata arteria forma-  
tus est, sed est spurius, vel ex sanguine,  
de arteria, quæ vulnerata supponitur,  
effluente, natus, vel ex cellulosa, arte-  
riam circumdante, formatus. In utroque  
casu faccus est adventitiuus. Hæ tres a-  
neurysmatum species iisdem signis se ma-

Cysticum  
spurium.

nifestant, nempe: tumore pulsante, cuti concolore, qui pressione retrocedit, &, remittente pressione, redit.

**Ecchymotium.**

*Aneurysma ecchymoticum* dicetur ille tumor, qui, vulnerata arteria, sanguine in cellulofam vicinam effluente, nascitur; non concolor cuti, non rotundus, sed lividus, latius diffusus, non pulsans, nisi magnum arteriæ vulnus fuerit, unde sanguis effluit, pressione non retrocedit, sed, latius sese expandens, strepitum edit. Species hæc aneurysmatis ab ecchymosi non aliter distinguitur, quam, quod ibi sanguis e vena, aut fractis parvis arteriis, hic vero ex arteria profluat, & majori quidem, ut jam monitum fuit. Non inapte cæterum, ad distinctionem ab aliis aneurysmatum speciebus, aneurysma hoc aneurysma ecchymoticum dicitur.

**Causa proxima.**

Ex hucusque dictis omnino intelligitur, causam proximam omnium aneurysmatum consistere in præternaturali arteriæ dilatatione, vel tali arteriæ vulnere, ut sanguis quidem inde effluat, non tamen per integumenta erumpat, prius vulnere nullo existente, vel arteria nimis parva obstrueta.

Qua-



Quapropter in numerum causarum <sup>Causæ re-</sup> remotarum recensendæ veniunt omnes il-<sup>motæ.</sup> læ, quæ arteriæ præternaturalem dilatationem faciunt, quæque continuitatem laterum canalis ita solvunt, ut sanguis inde effluere possit, nec tamen per vulnus in cute factum, vel, vulnere nullo præsentē, extra corpus fluere.

Eadem omnino causæ utramque possunt arteriæ conditionem inducere, pro ratione nempe intensitatis, qua agunt. Sic ex. gr. vulnus unam, alteramve arteriæ tunicam lædat; potest causare arteriæ dilatationem; sed vulnus idem, si in arteriæ cavum usque penetret, facit aneurysma ecchymoticum, vulgo spurium. Quod, cum ita sit, licet omnium aneurysmatum causas simul percurrere.

Causæ itaque aneurysmatis remotæ <sup>Duarum clas-</sup> aliæ sunt, quæ ipsam arteriam immedia-<sup>sium.</sup> te ita disponunt, ut impetum sanguinis ferre non possit, quin rumpatur, vel saltem dilatetur. Aliæ vero sunt, quæ sanguinis motu, præternaturaliter in parte aucto, arteriam in præternaturalem dilatationem cogunt, vel rumpunt.

Cl. 1ma.

Ad primam caufarum claffem pertinet *vulnus*, *punctura*, vel *fectio*, arteriæ inflita, quibus vel omnes arteriæ tunicæ dividuntur, vel una, alterave tantum illarum. Frequenter tales cafus poft venæ fectiones eveniunt, dum, pertufa vena, cuspide lanceolæ fubjecta arteria vel læditur, vel plane pertunditur.

Alia caufa eft *contufio*. Notum enim eft, contufione, lacerata continuitate partis, contufam arteriam debilitari poffe, ut, ita foluta, dilatationem admittat, Nati a contufione aneurysmatis exemplum recenfet Lancif. prop. 22. Homo quadragenarius arcæ lignæ icu in fterno fufcepto poft leviffimam tufficulam cum fanguineis fputis de dolore profundo conqueritur, quem pulfatio fubito ibi loci excepit. Sectum cadaver exhibuit faccum aneurysmaticum, mali punici magnitudine, in antica, & dextra flexuræ aortæ parte protuberantem. *Diffractio* alia caufa eft. Partem in diffractione debilitari debere, fequitur, fi confideremus, elongatas fibras a fe mutuo removeri, ex quarum propinquiore contactu robur dependet. Verum diffraclarum fibrarum aliquæ etiam rumpi poffunt, aliis vicinis integris manentibus, unde partes debilitantur.

Malum



Malum hoc describit Hypp. *ruptionis*, Gal. vero *vulsionis* nomine: Dicitur *ruptio fibrarum*, dum *fibræ musculares* vi amplias *distrahuntur*, & *separantur in carnibus*, aut *venis*, a *laboribus*, a *casibus*, &, si quis *onus magnum tollat*, & a *curfu*, & a *lucta*. Exemplum aneurysmatis a distractione nati ex Act. Acad. Paris. l'hist. de l'acad. des scienc. l'an. 1700. pag. 50. refert Ill. V. Swiet. in comm. ad aph. 176. Boerh. Alia causa est *erosio*. Humores nostros acrimoniam posse contrahere talem, ut non tantum molles partes, sed ipsa etiam dura ossa rodant, in propatulo est; quot concipi possunt rodentes in corpore vivo acrimoniæ, tot sunt ex hoc capite aneurysmatum causæ adsignandæ. Aneurysmatis in dextra carotide in matrona hysterica, & scorbutica; in subclavia sinistra in venditore pecorum, & cytharædo, hominibus venereis exempla adfert Lancis. prop. 31. & 33.

Alia causa est *inflammatio*, & *suppuratio*. Conquestus est Monroo in Act. Edimb. parum de inflammatione majorum vasorum cogitari, in quibus tamen, ad oculum injectionibus demonstrari, constat, & inflammationem, & omnes inflammationis exitus locum habere posse. Quodsi igitur inflam-

matio, in arteriæ majoris lateribus orta, in subpurationem transferit, consumpta tella cellulosa arteria debilitata, impetui sanguinis ferendo impar, vel debilitari, vel rumpi plane poterit. Spontè nata aneurysmata sæpe tali causæ adscribenda erunt. Hujus causæ observationem nobis dedit Ill. ac Magnif. Archiater L. B. de Störk Anno Med. 2. cad. 14. *Arteria aorta, inquit, ex sui principio, ad pollicis latitudinem, subpuratione adfecta fuit.*

Alia causa est, *congenita, & hæreditaria ad aneurysma vasorum constitutio, & dispositio.* Sicuti multarum partium vitia congenita esse possunt, ita etiam aneurysmatica arteriæ, in aliqua sui parte debilitatæ, diathesis congenita esse potest, qua fit, ut sensim sanguinis impulsui cedens arteria in saccum aneurysmaticum dilatetur.

Non tantum congenitum, sed & hæreditarium tale vitium esse posse, exemplo ostendit Lancis. prop. 74. *Istius, inquit Lancis. istius hæreditariæ dispositionis exemplum præbuit nobilissima quædam familia, in qua quatuor se se excipientes generationes, proavum, avum, patrem, & filium pessimo hoc mali genere, Aneurysmate nempe, vexatos fuisse, nobis innotuit. Qui satis*  
ces-

*cesserunt, aneurysma cordis palam ostenderunt incredibilie; qui vero adhuc in vivis est ex tertia generatione, talibus symptomatibus affligitur, quæ merito latentis mali suspicionem injiciunt.*

Alia causa aneurysmatis cystici est, *nimum aneurysmatis augmentum*, Nimia enim distractione saccus aneurysmaticus disrumpi potest, unde sanguis effunditur, in cellulosam effluit, & fit aneurysma spurium, quod ecchymoticum appellavimus.

Porro *paralysim arteriæ*, advertente Lancis. causis aneurysmatis adnumerant. Verum, cum non tam facile concipi possit, quasdam tantum muscoli cavi, qualis arteria est, fibras paralyticas fieri, quæ ad causandum aneurysma requireretur credit cum illo Cl. Monroo, raro, si unquam, aneurysma ab hac causa ortum fuisse. Hæc sunt vitia, quæ, arteriam debilitando, aneurysmatum causæ reperta sunt; Quæ vero, impetu, præternaturaliter aucto in parte, arteriam in præternaturalem dilatationem, aut in ruptionem cogunt, sunt sequentes.

*Clamor, vociferatio, vomitus, nixus, Cl. 2da. saltatio, animi affectus vehementes. Quate-*

tenus his omnibus de causis sanguinis motus ultra naturalem vi angetur, fortius ad arteriæ latera agitur, & aliquem locum, qui naturali minus resistit, aut magis sanguinis moti impetui exponitur, in saccum aneurysmaticum distendere potest. Inde fit, ut plerumque aneurysmata, ab hac causa orta, arteriam aortam in curvatura sua teneant; cum directus sit sanguinis, a corde acti, in eam impetus, qui in aliis arteriis lateralibus tantum latera ferit; &, ut etiam frequenter in arteriis subclaviis eveniant, quia illæ, aliis arteriis liberiores, vicinis partibus non adeo sustentantur.

Porro alia, hunc spectans, causa est: *mercurii nimius usus*. Omnium fere Medicorum consensu aneurysma facili negotio ex mercurii abusu proficiscitur. Ita Goræus, Ballonius, aliique, adpositis exemplis indubiam rei fidem nobis certam fecerunt. Ratio eventus in mercurii pondere esse videtur, quo inprægnati humores nostri majori momento motus in articularum latera irruunt, magisque, & violentius ea afficiunt. Accedit, & magnam attentionem meretur, omnia solvi in hominibus labe venerea infectis, quibus plerumque mercurialia adhibentur. Pa-  
rie-

rietes, acri erosos, & debilitata esse vasa, ipsasque arterias adjacentibus partibus quandoque erosis, sustentaculis privari, minus resistere, unde fit, ut majori momento motus irruentem sanguinem minus ferant, quin præternaturaliter inde jam dilatentur, vel rumpantur penitus.

Alia causa est, *arteria in aliqua sui parte ossæ*. Arteria, in aliqua sui parte ossæ facta, & rigida, actionem cordis utique experiri non potest, quia ad cedendum inepta est; unde fit, ut impetus sanguinis, qui cæterum toti arteriæ dilatandæ impendebatur, nunc fortius agat in partem illam arteriæ, quæ est proxima obstaculo, quod in arteria ossæ, & rigida objicitur cordi, unde violentius dilatatur, & victa sensim illius naturali resistantia, in aneurysmaticam magnitudinem cogitur. Lancis. de hac causa altum tenuit silentium. Scarpius in Tract. de operat. chirurg. primus illius causæ meminisse videtur. Confirmavit hoc Meckel in Hist. Acad. Scient. Berol. Heürmann in chirurgia sua duplicem adfert casum. In viro invenit aortam supra diaphragma triplo, vel quadruplo majorem, infra diaphragma solito multo minorem. In foemina infra diaphragma per longum tractum ossæ,

su-

supra diaphragma quidem aneurysmaticè dilatatam. Arcum aortæ perfectè osseum, crassum, & in transitu angustatum, ut nec parvus digitus admitti potuerit, refert Ill. ac Magnif. Archiater L. B. de Störk Anno Med. 2. cad. 13. sed simul inventus est ventriculus cordis sinister in magnum saccum membranaceum extensus.

Alia hujus classis causa est: *trunci, & ramorum, e trunco ortorum lumina solito minora.* Cel. Littre in Act. Paris. Anni 1712. historiam refert aneurysmaticæ arteriæ, ad duos, & dimidium digitos diametro auctæ; cujus causa fuisse videtur luminum arteriæ axillaris dextræ, & subclaviæ sinistræ parvitas. Eadem ratione, uti superius ostendi, resistentia hic sanguini ponitur, unde impetu majori truncum arteriæ ingreditur, hinc præternaturaliter dilatat.

Alia rursus causa est, *arteriarum compressio, obturatio, aut spasmodica constriction, in quodam illarum loco accidens.* Aneurysmatum, ab his causis natorum, exempla recenset Lancif. prop. 38, & 46. ubi, postquam, *hypochondriacis aneurysmata a fibrarum arteriarum, spasmodice contractarum, constrictione fieri, ostendisset, sub-*  
jun-



jungit: Plura adhuc ex convulsione orta aneurysmata videmus in delicatulis nutricibus, quæ, dum supra vires lac infantibus præbere student, pulsationis sensatione in arteria mammaria interna cum dolore correptæ fuerunt, quæ, ni lactare desiissent, in talia aneurysmata perductæ, fatis cedere debuissent. Viscera abdominalia infarcta. Dum viscera abdominalia sanguine crasso infarciuntur, sanguini promovendo resistentia ponitur, ponitur resistentia cordi propellenti, quare fortius in arterias propinquiores agit, violentius illas dilatat, ut non raro aneurysmaticæ fiant. Hypochondriacis cum materie quandoque ab hac causa aneurysmata fiunt; & advertit Lancis. illa frequentissime hypochondriacis in arteria cæliaca accidere.

*Vasorum nimia plenitudo.* Plenitudinem vasorum cordis actioni resistere, ex physiologicis notum est. Verum illa plenitudo in statu naturali major esse non debet, quam, quæ in arteria, vi cordis dilatata, novo ex corde expulso sanguine, locari possit. Dum plenitudo major est, ponitur cordi tale obstaculum, ut non possit evacuare contentum in suis cavis sanguinem, sed palpitet inani conatu, novo adveniente per venas sanguine magis

gis irritatum; unde fibræ cordis, sanguinis adfluentis vi, & copia magis dilatantur, & cor aneurysmaticè expanditur.

*Ingluvies*, quæ plenitudinem vitiosam generare solet, adeo frequens aneurysmatum causa est, ut Lancis. prop. 41. *omnium Medicorum, & Chirurgorum observatis exploratum esse*, affirmet: *ex centum aneurysmatibus, sponte, seu absque ullo causæ externæ concursu, obvenientibus, plus dimidia parte in gulosis, & bibacibus evenire.*

Præter has causas, cor aneurysmata sibi adhuc propria habet, quæ in ipsius cordis vitio consistunt. Quantum cor per causas illas, quæ sanguini ejiciendo obicem ponunt, affici debeat, ex hucusque dictis patet; sed cor, substantia sua, suppuratione, post inflammationem pro parte consumpta, debilitari ita potest, ut naturaliter constitutis arteriarum resistentiis devincendis sufficere non possit. Cor autem suppurari posse, & suppuratione consumpta substantia, facile debilius reddi, nova observatione ostendit Ill. ac. Magnif. Archiater L. B. de Störk Anno Med. 2. cad. 14. Idem fieri videtur in animi affectibus tristibus, in quibus cordis actio adeo dejecta est, ut expellendæ



e cavis suis sanguini impar sit, unde sanguis, in ejus cavis adcumulatus, anxietates magnas causat, quas frequenter præternaturalis cordis dilatatio sequitur.

*Valvulas, duritiem prope osseam nactas, non inmerito Lanc. prop. 43 inter causas aneurysmatum cordis refert. Recenset historiam Canonici, in quo una ex valvulis aortæ ossea, duæ cartilagineæ videbantur, ventriculo dextro, sinu, & auricula illius lateris dilatatis, sinistro ventriculo naturaliter constituto. Mirabatur Lanc. ventriculum sinistrum, in cujus ostio tamen malum hæsit, male affectum non fuisse. Verum robur illius dilatationi ejus obstitisse videtur, cum, adeo validum fuisse, notet Lanc. ideoque malum potius ventriculo dextro, qui per se debilior est, communicatum fuisse. Cum enim ventriculus sinister, ob valvulas aortæ obstantes, se evacuare non potuerit, quia præternaturaliter constitutæ erant, neque sanguinem promovere, utique sanguini, e ventriculo dextro per pulmones in cor sinistrum transfundendo, obstaculum natum est, & difficultas, unde demum cor dextrum, sanguine libere se evacuare non potens, eo plane modo affectum fuit, ac si causa morbi in eo ipso locata fuisset.*

*Polypi* certe non infimam vim habent in aneurysmate cordis producendo. In iis, qui sæpe animo linquuntur, polypi nascuntur, ideoque sæpe aneurysma cordis; vel polypus, orificio ventriculorum coarctato, sanguini expellendo obstaculum objicit, vel in ipso ventriculo hærens, cor in palpitationem irritat. Utroque modo cordis ventriculus debilitatur, quo factò facile ipsius dilatatio præternaturalis accidit.

*De hæreditaria ad aneurysmata cordis dispositione* etiam mentionem injicit Lanc. cujus exempla superius, ubi de congenito, & hæreditario vitio locuti sumus, jam relata sunt.

**Signa.** Recensitis sic causis, quæ eneurysma producere possunt, videnda sunt signa, quibus aneurysma præsens cognoscatur, & distinguatur. Definitum est aneurysma in genere, quod sit: tumor, plus, minus pulsans, corde, vel arteriis aliquo sui loco dilatatis, vel eorum soluta continuitate, natus. Unde patet: primo, tumorem pulsare, inprimis in illis locis, ubi arterias magnas decurrere, docet Anatomicæ, dum & magnus cordis pulsus suspicionem diversam aneurysmatis jam pridem in-

injecit. Quia vero multa sunt, quæ aneurysmatis præsentis diagnofin difficilem reddunt, idcirco diligenter enarranda sunt omnia figna, quæ aneurysma proderè poffint, ut illius fufpicio habeatur, & de illius præfentia in dato cafu rite judicari poffit.

Atque primo dicendum eft, quibus *Internis.* fignis internum aneurysma cognofcatur.

Internum aneurysma vel in corde eft, vel in magnis arteriis evenit.

Cordis aneurysma autem, ut jam fu- *Cordis.* perius monitum eft, frequentius in ventriculo dextro, quam finiftro invenitur; fæpius in auriculis & finubus, cujus ratio ex debilitate harum partium dependet, & ex eo, quod plures cauſæ fanguinis per pulmones tranfitum impedian, & fanguis in corde dextro remoram patiatur, hinc coagulum obveniat, inde dilatationis eorum ratio obſcura non eft. Aneurysmata vero, quæ interne accidunt in arteriis, ubique locorum, etiam in magnis arteriis obvenire poffunt. Frequentius tamen in aortæ arcu obſervantur, quod is impetum fanguinis a corde projecti plurimum experiatur, unde etiam

interna arteriarum aneurysmata sæpissime in thorace locari, contingit.

Sunt autem primaria aneurysmatum internorum signa: *Pulsus insolito auctus ad motum muscularem, aut in animi affectibus, & omnibus illis causis, quæ sanguinis motum ad cor accelerant.*

Ubi morbus in pectore hæret, *pulsatio ibidem sentitur. Ex huiusmodi causis violentioribus suffocationis metus imminet, & respiratio difficilis malum præsens auget, pulsus intermittens fit, & animi deliquium accedit. Porro docuit observatio: quod illi, quibus aneurysma intus in pectore inclusum hæret, dum incurvato antrosum pectore sedent, melius habeant. Interdum ex prægressis intellectis causa erui potest, quæ aneurysmati producendo apta fuit. Quamobrem omnia inquirendo sunt.*

Animadvertendum autem est diligenter: Ista signa, etsi, sat manifesta esse, videantur; tamen interdum aneurysmatis interni diagnosin sat obscuram relinquere; sæpe ita; ut non infimæ famæ Medicos sæpius in errorem induxerint.

Duæ autem potissimum sunt rationes; quarum una est: quod aneurysmata a causis sat absconditis, ut audivimus, oriri possint; altera ratio est: quod, symptomata, quæ aneurysmata interna comitari solent, aliis etiam morbis communia esse, inventum sit.

*Pulsationem quippe insolitam, citra aneurysmatis præsentiam in externis tumoribus quandoque adfuisse, deinde dicitur, & eandem in internis observatam fuisse, citra aneurysma præsens, observata docent.*

Præter alia plura exempla, duo recenset Cl. de Haen in rat. med. tom. 4. unum, ubi a materia atrabiliaria, & aliud, ubi a spirituum inordinato motu *spectabilis arteriarum vicinarum pulsatio, cum omnibus symptomatibus interne latentis aneurysmatis, aderat.*

*Pulsus inordinatus, intermittens, animi deliquia, æque quidem ab aliis causis evenire possunt, imo & illud signum, nempe: Levamen inclinato antrorsum pectore, cum aliis affectionibus, ab aneurysmate alienis, conjunctum fuisse, docet idem Cl. Vir.*

Duo exempla refert Morg. in epist. anat. 18.

Animadvertendum est secundo: non omnia ista signa semper simul adesse, ubi aneurysma adest, neque semper aneurysma adesse, ubi hæc signa adsunt.

Hinc omnino clarum est, Morg. non abs re meminisse: *non ad quædam tantum, sed ad pleraque attendi debere signa, quia, uti non semper omnia adsunt, ita, si quædam tantum spectentur, sæpe numero decipimur, & diagnosi secura non est.*

Major tamen haberi poterit ejus certitudo, si *præsentibus enumeratis signis, causas, unde fieri possint, internas, prægressas fuisse, constet.* Alia res est, si aneurysma, interne natum, externe se manifestet; quod quidem interdum accidit.

In Aët. Paris. Anni 1733. habetur tale exemplum aneurysmatis interni subclaviæ in ortu suo ex aorta, quod, in anteriori colli parte extrorsum tumens, tumorem exhibuit rotundum.

In iisdem Aët. aliud habetur exemplum aneurysmatis, quod, tumore, in duobus



locis intercostalibus præfente, protuberavit.

Atque hæc de aneurysmatibus internis.

Aneurysmatis arteriæ cylindroidis signa sunt: *Pulsatio præternaturalis, & arteriæ cylindroidis.* Exterioi.  
*per longiorem sui tractum diameter aucta.*  
 Sed, aneurysma hoc raro in externis obvenire, monitum est; quapropter obscura est illius diagnosi, & sæpe tantum per conjecturas acquirenda.

Aneurysma cysticum arteriosum, vel *Cystici arteriosi, & spurii.*  
 & cysticum spurium, si in exterioribus hæreat, his signis cognoscitur, & ab aliis tumoribus distinguitur, nempe: *tumore, in loco, quo magna arteria decurrit, sito; pulsu cum aliis arteriis synchrono; tumore pressioni sedente, subterfugiente in arteriam e sacco aneurysmatico sanguine; dum pressio remittit, idem magnitudine iterum redit tumor; color tumoris reliquæ cuti concolor non est; pressione enim tumor aneurysmaticus evanescit, ast, hac ablata, rediens, per distractionem adtenuata cute, colorem rubrum induit.*

Multum certe interest, aneurysmaticum tumorem cognoscere, illumque ab aliis distinguere. Tristia exempla hominum insciorum, & temerariorum rara non sunt, qui, dum fluctuantis quid in tumore invenirent, abscessum esse, credentes, maturarunt, & aperuerunt, unde cum sanguine simul vita de corpore effluxit.

Narrat hanc in rem Cl. de Haen historiam juvenis in Academia Leidenensi studiosi, qui, ex contusione, tumore aneurysmatico affectus erat, &, spreto Cel. Boërh. consilio, qui aperturam tumoris prohibuit, illo, per ignorantem chirurgum aperto, spiritum cum sanguine effudit. Plures tales prostant historiæ. Notabilis habetur apud Lancis. prop. 21.

Ast, obponet fors quispiam: non magnam in cognoscendo aneurysmatico tumore, si is sensibus pateat, esse difficultatem, cum illius signa evicta sint, & a vera ejus diagnosi aberrare vix possibile sit vel parum tantum adtento.

Verum difficultas maxima in eo est, quod inveniantur aneurysmata, vere cystica, quæ non cedunt pressioni, quæ non pulsant, quæ tamen evidëntia illa signa  
sunt,



sunt, quibus aneurysma se ab aliis tumoribus distinguit.

Causa hujus in eo consistit: quod, etsi arteria, in saccum distenta, naturali tenuior fiat, tamen sæpissime crassitie ita augeatur, ut sanguini adpulso non amplius cedat, non dilatetur, non pulset. Sanguis, in aneurysmatico sacco arterioso stagnans, conquassatur, cordis ictibus, & arteriæ contractionibus in lamellas abit, quæ, arteriæ parieti adplicatæ, saccum insigniter crassitie augere visæ sunt. Imo interdum inter ejusmodi lamellas congruatus includitur sanguis, quo aneurysma adhuc notabilius increscit. Nec hoc solum, etiam cartilagineam, imo osseam duritiem saccus aneurysmaticus induisse visus est; quo factò, ratio profecto clara est, saccum aneurysmaticum nec pulsare, nec, pressum, retrocedere potuisse.

Porro pulsus non percipi potuit in aneurysmate, quia, dum in magnum volumen increvit, impetus a corde pulsi sanguinis non adeo valide agere potest in saccum aneurysmaticum magnum, ut ille singulis cordis ictibus elevetur.

Ex his etiam rationibus satis cæteroquin peritos in diagnosi aneurysmatis exhibenda errasse, & pro medela, mortem adtulisse, observata docuerunt.

De aneurysmatici sacci crassitie ultro adhuc loquendo, vidit Morg. in aneurysmate, quod tibicen gesserat, saccum crassum, qui in lamellas, non secus, ac cepæ, resolvi poterat. Vidit Ruysch. in ingenti aneurysmate, quod in pectore, sponte natum, gesserat homo, innumerabiles pene tunicas, crassas, carnosas, sat tenaces, sibi invicem adcumbentes, sanguine inter has tunicas delitescente; externa tamen tunica, quæ arteriæ dilatatæ membrana erat, straminis tantum crassitiem habuit, omnis reliqua moles a polyposis concretionibus pendebat.

Verum, mirari non oportet, debilitatas arteriæ membranas sanguinis adfluentis impetu facile rumpi effuso cum vita sanguine, nisi variis concretionibus firmarentur.

River. cent. 4. obs. 34. ubi historiam aneurysmatis recenset, simulque monet: *tumorem illius admodum tensum, & cartilagineum evasisse*, advertit: *duritiem eam perinde*

*inde elucescere, quod dilatio arteriæ, sine  
ruptione diu durans, eam tensionem, & du-  
ritiem efficiat.*

Quæ cum ita sint, tumores, ad arte-  
rias siti, diligenter examinandi sunt; si  
suspicionem aneurysmatis injiciant, in  
causam, ortus rationem, & omnia, quæ  
prægressa sunt, indagandum, ne, cum  
ægri detrimento, & nostro opprobrio in  
aperturam tumoris consentiamus, quæ ef-  
fuso inde rivatim sanguine, adeo certo  
mortem infert.

Secundo adhuc hanc in rem monen-  
dum est: quod, quemadmodum non om-  
nis tumor pulsans aneurysma est, ita et-  
iam non omnis tumor non pulsans aneu-  
rysmata non sit.

Illust. & Magnif. Archiater L. B. de  
Störck in anno Med. 2. Cad. 19. recen-  
set historiam foeminæ, quæ, post acutissi-  
mum in capitis parte dextra dolorem,  
non sine molestia pulsatione ibidem affi-  
ciebatur; post anni spatium os temporale  
dextrum tuberculum elasticum, pulsans  
exhibuit, quod continuo magis auctum,  
ut quatuor mensium spatio ovi gallinacci  
magnitudinem adquireret; pulsus in eo  
cum

cum illo aliarum arteriarum fynchrone continuabat. Pro aneurysmate habitum fuerat. Sed sectum cadaver nil minus, quam aneurysma exhibuit, sed tumorem variegatum concreto sanguine, quasi atheromatoso, & quadam veluti carnositate constantem.

Quæritur jam, unde illa tumoris pulsatio? Nullum, in tota capitis plaga, cui tumor infedit, cranium inventum est, etenim omne os in membranam redactum erat. Hinc mirum non est, pulsu, quo cerebrum omni cordis ictu elevatur, tumorem, illi impositum, similiter elevatum fuisse, & mentitum esse pulsum.

In actis Med. Lond. antea laudatus Kunt. l. c. similem animadversionem facit occasione tumorum illorum, qui in anteriori colli parte sæpius observantur, & pulsu, a vicina arteria mutuato, præsentem, incautis aneurysma fingunt.

Quapropter in aneurysmatico tumore determinando non soli *pulsationi* fidentum est, sed simul examinandum, num, *pressus, tumor retrocedet, & pressione ablata, revertatur.*

In examine aneurysmatis cavendum est, ne subito comprimatur, sed successive, leniter; subito namque compresso tumore, sanguis, in sacco aneurysmatico contentus, cor versus in arteriam retropressus, cordis motum suffocare potest, unde anxietates, animi deliquia, subita mors, suffocato penitus, obruto sanguine, corde, accidere potest. Imo fieri potest, ut sanguis, in aneurysmatico sacco coagulatus hærens, rudiori pressione in canalem arteriosum reprimatur; unde intensius primo ponitur cordi obstaculum, quo motus illius post maximas anxietates suffocatur.

Item observandum est, ne compressum aneurysma subito relaxetur. Pressione nempe subito ablata, sanguis, in vacuum saccum illabens, cordi subtrahitur, animi deliquia accedunt; qua propter aneurysmata eadem, qua comprimuntur, lenitate remitti debent; atque hoc est, quod secundo monendum fuit, hæcque diagnosin aneurysmatis cystici, quod communiter verum dicitur, spectant, de qua sub eodem capite dictum est, ubi de aneurysmate cystico arterioso vero, & spurio locutus fui; quia, nisi ex prægressis sciatur: arteriam *omnino non, aut non integre*

tegre pertusam fuisse, non facile interno-  
sci, & distingui poterit.

Ecchymotiei  
externi.

Signa autem, quibus aneurysma ec-  
chymoticum, communiter spurium di-  
ctum, cognoscatur, sunt: *tumor latius  
diffusus, obscure pulsans, pressione non eva-  
nescens, colore livido aut purpureo defoeda-  
tam cutim exhibens.*

Causa, hunc tumorem efficiens, est  
sanguis, in cellulosa ex læsa arteria ef-  
fusus, unde satis ratio recensitorum signo-  
rum patet. Latior tumor est, quia in  
cellulosam delapsus sanguis hinc inde per  
eam facile diffunditur; color lividus, aut  
ruber a sanguine effuso, per cutim trans-  
parente fit; nonnisi obscure pulsatur, quia  
sanguis coagulatus cordis, illum impel-  
lentis, motum suffocat; non retrocedit,  
dum premitur, ob eandem sanguinis coa-  
gulati rationem. Verum recens talis tu-  
mor tamen, pressus, retrocedere videtur;  
non, quia effusus sanguis arteriam intrat,  
sed quia latius in circuitu cellulosa su-  
bit; unde etiam fit, ut, pressus talis tu-  
mor, strepitum edat.

Inde intelligitur, qua ratione aneu-  
rysmata tale a tumore illo, quem ecchymo-  
si



fin communiter dicimus, & a sanguine venoso, in cellulofam effuso, producitur, distinguatur.

Verum etiam hic difficultas obtinet. Quandoque enim contingit, ut talis tumor ecchymoticus venosus in illis locis contingat, in quibus magnæ arteriæ decurrunt, unde, ob subjectam arteriam pulsantem, obscure pulsare videtur, quod facile imponere posset, tumorem hunc esse aneurysina ecchymoticum.

Diligenter itaque omnia perpendenda sunt: num lædens causa *externa* fuerit; num *arteriæ discissio* signis sui se ostenderit; num, si causa interna fuerit, in loco, ubi decurrit arteria, atque, ubi tumor oritur, *dolor*, *distensio*, *erosio* præcefferint, & denique, num causa interna lædens talis fuerit, quæ *continuitatem arteriæ* solvere possit.

Quod si vero aneurysina tale ecchymoticum in interioribus corporis locis hæreat, difficilior cognoscitur. *Dolor* cum *pulsatione*, causam, pulsum mentientem, portendens, in medio illius partis observatus, & *succedens* dein in arteria illius

par-

Interni,

partis ponderis cujusdam sensus de ejus præsentia probabiliter concludere sinunt.

Alius ex obs.  
Morg.

Sed alius adhuc aneurysmatis mentionem facere oportet ex observationibus Morgagni, quod sequenti ratione se habet: In epist. 16. num. 17. sectionem cadaveris describit, in quo invenit arteriam aortam prope cor dilatatam; ea aperta, vidit, sanguinem, exesa arteriæ tunica interiori, sub exteriorem penetrasse, eamque removisse ita, ut magna sanguinis quantitas in fælo illo spatio contineretur, ruptaque ea tunica in pericardium effusa inveniretur. Tale quid etiam in externis arteriis contingere potest, formarique inde aneurysmatis ecchymotici species, quod aneurysma diffusum non sit, ut prius, sed, secundum arteriæ tractum decurrens, plus, minus oblongo tumore.

Venosi.

Sed jam etiam de signis aneurysmatis antea dicti venosi dicendum est. Aneurysma hoc etiam varicosum dictum est; & describitur primo in Act. Med. Lond. nempe: in tom. 1. num. 26. & in tom. 2. num. 36. descriptum est a Kunter. & a Kleckorn tom. 3. num. 13. sequenti autem modo se habet, & , ut mox dicetur, oritur.

Inter-

Interdum accidit, si vena secetur, simulque pertundatur arteria subiecta, non fiat aneurysma ecchymoticum, effuso, de arteria vulnerata sanguine, sed, ut ligaturæ externæ ope arteria subiecta pertusa appressa venæ externo vulnere coalescat, maneatque adposita vulnerata vena vulnerei subiectæ arteriæ, pariter pertusæ, aperta, ita, ut duorum horum vasorum, arteriæ nempe, & venæ. sibi respondentibus vulneribus inter utrumque habeatur communicatio, unde evenit, ut a corde in arteriam pulsi sanguinis portio per cicatrifatam arteriæ, & venæ aperturam venam subeat, eamque præternaturaliter dilatet, & in varices temporis tractu efformet.

Intelligitur hinc facile: novam hanc esse aneurysmatis speciem, quæ ad nullam hætenus adlatarum referri valet.

Signa, quibus affectus iste cognoscatur, collegit Kleekorn l. antea cit.

I. *Manifestus* auditur *strepitus*, quem facit sanguis, ex læsa arteria in venam erumpens. Strepitus hic similis est strepitui ebullientis aquæ, aut illi, quem faciunt circumvolitantes apes, II. *Strepitus*

*tus iste impediri potest, dum in illo loco, ubi vena pertusa fuit, & pertusa simul arteria, adpresso fortiter digito, foramen, quo arteria in venam aperitur, clauditur. III. Arteriæ pulsatio in loco infra communicationem ejus cum vena per vulnus factam. Hæc pulsatio infra communicationem obscura est, sed supra eam manifesta. IV. Venæ sunt varicosæ, & pulsant. V. Clauso per compressionem arteriæ vulnere varices minuuntur, & non pulsant amplius vena, quæ symptomata remittente compressione illius loci illico vehementiora sunt.*

Atque istis signis sat manifestis tale aneurysma sæpius cognoscitur; neque latet ratio, quare varicosum illud aneurysma adpellare voluerit Kleekorn.

Data ita diagnosi aneurysmatis, ejus varii effectus considerandi sunt.

#### Effectus.

Effectus pro ratione loci, in quo hærent aneurysmata, pro ratione magnitudinis, pro ratione durationis, & humorum crassi, varii sunt.

Quo aneurysma propius est cordi, eo plus functiones vitales lædit, & plus lethale est. In pectore situm aneurysma, con-

compressio pulmone, respirationem lædit, & interdum suffocationis periculum infert, cordis actionem turbat, ita, ut pulsus frequentius intermittat, interdum plane ferietur. Quæ omnia certius eveniunt, dum *ipsum cor* aneurysmaticum est.

Advertendum autem est: effectus istos non semper *eodem gradu*, & eadem *intensitate* observari, licet causa præsens eadem semper esse videatur. Interdum per paroxysmos tantum suffocationis, & mortis periculum incurrunt ægri. Phœnomeni hujus ratio in eo quærenda est, quod, etsi morbi causæ, dilatatio nempe arteriæ magnæ, aut cordis ipsius, semper adsint, aliæ tamen accedant causæ, quæ non semper adsunt; & cum aneurysmate præsentē conjunctæ, mixtæ, effectum novum, & novum morbum producant, ut: animi affectus, motus musculares, situs corporis mutatus, error in diæta, nimia ventriculi repletio, acria assumpta, & similia, quæ, effectū suo ad aneurysma præsens accedentia, novam causam ponunt, & morbi exacerbationem causare possunt.

Porro, quo *majus* est aneurysma, eo plus vicinas partes afficit, totumque demum corpus ad cacochymiam disponit.

Stagnans namque in magno aneurysmate sanguis fere ibi quiescens, quasi degenerat, & demum totum sanguinem caco-chymicum reddit.

Si *diutius affligat* malum, sacco continuo aucto, tunicae arteriarum adtenuantur, nisi aliquibus spuris, e sanguine coagulato natis, membranis firmior fiat, sustineatur, rumpitur, cysticum in ecchymoticum transit, vel disrupta cute, effuso sanguine, mortem infert.

Idem effectus sequitur, dum sanguis, inter spurias illas membranas, quas jam descripsi, stagnando, acrimoniam contrahit, & saccum aneurysmaticum erodit.

Non parum etiam ad sacci aneurysmatici erosionem, & rupturam conferre videntur fragmenta ossæ, quæ interdum hinc inde in sacco aneurysmatico funesto eventu reperiuntur. Jam antea insinuatum est, saccos aneurysmaticos magnam interdum crassitiem adipisci, imo interdum tantam densitatem acquirere, ut cartilagineam, & pene osseam firmitatem habeant, cujus ope contra omnem rupturam provida consuluit natura. Sed etiam visum est, saccum aneurysmaticum ossæas  
squam-



squammas hinc inde per suam substantiam gessisse, quæ politam aliquando admodum, aliquando asperam habebant superficiem.

De natura harum squammarum non conveniunt omnes: ex materia tophacea concretas volunt alii; sæpissime osseas esse probat Morgagni epist. 27. num. 23. easque materia, quæ alia ossa componit, illuc morbose deposita, collecta generari autumat; & plura istius sacci aneurysmatici minuta corpora osseam naturam sæpissime manifeste præseferunt. Ita, factum esse, sæpissime visum est, ut tale os natum ossis sterni portionem, quæ in ipso sterno deerat, ita æmuleretur, ut pro ipsa illa deficiente ossis sterni portione inponeret; quasi, nescio, qua ratione, in saccum aneurysmaticum transisset. Casu simili os in substantia aneurysmatis natum visum est, dum ossis sterni portio ab adjacente aneurysmate, quod aliis etiam substantiis osseis accidisse visum est, consumptum fuit. Jam dictum est, quomodo osseæ squammæ, quæ in sacco aneurysmatico formantur, ad ejus erosionem, & distractionem, demumque rupturam conferant, ut autem hæc eo melius ad-

huc intelligentur, oportet solum ad pauca quædam animum adhuc advertere.

1mo. Squammæ istæ inter arteriæ tunicas reperiri solent. 2do. Adco asperam, imo & aculeatam aliquando habent superficiem, ut, quod Brunner. in aorta sui foci evenisse, scribit in Act. Acad. Nat. Cur. in App. ad ann. 3. Dec. 3. ut, inquam, ossea aspredine digitos inmissos offenderit, & prominentibus aculeis pupugerit.

Hinc jam non est difficile intellectu, quomodo officula ejusmodi sacci aneurysmatici distractioni occasionem dare possint. Non potest videlicet arteria se contrahere, quin aspredines, & quasi aculeos in adjacentem arteriæ tunicam urgeat; neque potest sanguis a corde projectus arteriam dilatare, quin eandem tunicam ad eosdem aculeos adprimat, unde profecto tunicæ illius distractio provenire debet, & rupturæ periculum, quale in sene, & muliere ex hac causa aneurysma vidit Morg. in epist. 26. num. 15. & 17.

Etiam *nimia mole auctum* aneurysma, sive cysticum, sive ecchymoticum, vicinas partes comprimit, unde variæ fun-  
ctio-

tionum læsiones eveniunt. Ab aneurysmate aortæ œsophagum comprimente, deglutitionem ineditam vidit Morg. & a compressis pulmonibus ab aneurysmate, interne in thorace locato, respirationem ineditam, & tussim inde ortam, interdum videre licuit in nonnullis aliis.

Compressio hæc atroces dolores causat, & humorum motum in illis partibus, quæ premuntur, penitus suffocat, unde gangræna partis, sphacelus, & mors. Atque hæc eo citius, & eo majori atrocitate eveniunt, ubi per aneurysma nervi majores irritantur, premuntur, destruuntur.

Unde recte Morg. in epist. 50. ad art. 12. *Aneurysmata, vel etiam externa, ubi nervis, aut aliis partibus, sensibilibus magis, proxima sunt, tametsi sanguinis perfusio non accedat illico, post acerbissimos tamen cruciatus demum interficere possunt.*

Præterea mira certe sunt, quæ de effectibus aneurysmatum in dura ossa apud observatores leguntur. Ruysch. in ingenti illo in pectore sito aneurysmate, in casu antea memorato omnes costas, & os sterni in nihilum quasi redacta invenit.

Jam sæpius cit. Cel. Kunter. in Aët. Med. Lond. historiam aneurysmatis describit, quo non tantum sternum, sed etiam vertebra totaliter consumptæ fuerunt. Num vero consumptio hæc caries sit, dubitat Kunt. quia corruptionem a carie diversam vidit. Credit potius ille, ossa a præterlabente sanguine solvi, eluique, non aliter, ac: gutta cavat lapidem, non vi, sed sæpe cado. Donec eum consumat.

Ex observationibus, a chirurgis, fide dignissimis, commemoratis, vim, ossa solvendi, sanguini tribuere videtur, quod quidem problematice tantum proposuit.

Aperuit chirurgorum illorum aliquis tuberculum in temporibus situm, quod, præter sanguinem, nihil continebat, nec generati ossis vestigium habuit.

Consentit cum hac observatione illa ab Ill. & Magnif. Archiâtre L. Bar. de Störck cad. antea cit. 19. facta observatio: ubi sub tumore sanguis concretus cum atheromatosa, aut carnosa materia continebatur, & cranium, osse ita emollito, morbosum fuit.

Sed longe diversa ab hac est illa ossibus ab aneurysmate inducta mutatio, qua non in membranas emolliuntur, sed, contrita quasi, destruuntur.

Quærit Morg. *cur dura potius ossa, quam molliores partes destruant aneurysmata?* & reddit rationem: *quod illa magis, quam hæ, resistent, & ideo vim aneurysmatis magis experiantur.*

Prognosis in aneurysmatibus, quod adtinet, id in genere sciendum est: *Omne aneurysma, quaecunque sit, difficile curari.* Prognosis.

Cæterum ad prognosin speciatim formandam, loci, in quo aneurysma hæret, magnitudinis, & speciei ratio habenda est.

Aneurysmata, quæ in internis corporis locis, in magnis arteriis, & corde obveniunt, curationem omnino nullam admittunt. Ratione loci.

Non multo felicius curantur illa, quæ in illis locis contingunt, quæ ob arterias solitarias, vel alias circumstantias operationem prohibent.

Magnitudi-  
nis.

Quo *majora* sunt aneurysmata, ce-  
plus timendum est, ne, distracta, disten-  
ta, vel rupta membrana arteriæ, sanguis  
cum vita effluat; ne, quæ in internis lo-  
cis hærent, vitam suffocent, aut, partes  
vicinas comprimendo, gangrænam, spha-  
celum, & mortem parti, quam tenent,  
inducant.

Accedit, quod *majorum* aneurysma-  
tum curationem suscipere non audeant  
chirurgi.

Ruyfch. de Amstelodamensibus chi-  
rurgis memorat: *Neminem ex illis per vi-  
ginti, & ultra, annos in vasta adeo civitate  
operationem hanc in se suscepisse.*

Denique aneurysmata *magna*, & *diu  
permanentia* cacochymiam universalem in-  
ducunt, ut mox antea dictum est.

*Parva* vero aneurysmata quandoque  
felicius curantur, vel, si non curantur,  
per plures annos innocue feruntur.

Sic refert Sennert. Prax. Med. 1. 5.  
*parte 3. exemplum mulieris, quæ ultra  
triginta annos aneurysma magnitudine jug-  
landis sine damno tulit.*

Ratio-



Ratione *speciei* aneurysmata cordis periculosissima sunt, nunquam curabilia. Speciei

Non faciliorem habent prognosin aneurysmata *cyliandroidea* dicta, quia in interioribus corporis locis fere tantum obveniunt, ubi manui accessus non datur.

Cæterum aneurysmata *ecchymotica*, seu *spuria* dicta cysticis periculosiora sunt, vel nimio sanguinis profluvio, vel sanguinis corruptione brevi ut plurimum funesta. *Cystica* diutius tolerari possunt, præcipue, si congrua fascia utantur miseri.

Celerius finiuntur *ecchymotica*, in quibus, si gangrenæ metus est, protinus auxilium in manu chirurgi adest.

Denique ex observationibus Moenichen, sed rarissimo plane casu, accidit, ut *ruptum* aneurysma cysticum sponte, sanguinis fluxu desinente, evanescat.

Curacionem jam adgredimur: Curatio.

Curatio aneurysmatis alia *palliatiua*, Duplex.  
alia *curatoria* est.

*Pallia-*

**Palliativa.**

*Palliativa* illa dicitur, quæ symptomata lenit, & effectus prohibet, vel saltem retundit, qui, aucto malo, evenire consueverunt.

Ratio hæc curandi in aneurysmate *cordis*, & arteriarum *majorum* maxime in illis locis, ubi manui *accessus non datur*; vel, alia ex ratione, *operatio prohibetur*, adhiberi debet; curatio namque curatoria in his locum *vix* habet.

Quæ enim Lancis. curatorum *internorum* aneurysmatum exempla recenset, ea incipientia tantum fuisse videntur.

Quapropter, solummodo curam *palliativam* in internis aneurysmatibus adhiberi posse, certo constat.

Quandoque tamen etiam in aneurysmatibus minoribus. *in locis exterius* sitis, ad augmentum eorum impediendum usu venit curatio palliativa, quod quidem tantum de aneurysmatibus *cysticis* verum est; *spuria* namque, seu *ecchymotica* solum protinus auxilium in operatione chirurgica habent.

Consistit cura palliativa in duobus Duplex est,  
 capitibus: *primo*, ut omni ratione *causæ* Prima.  
*internæ*, quibus aneurysma augeri potest,  
 vitentur, & impediantur.

*Secundo*, ut per artem externe adhi- Secunda.  
 bitam, *tumoris augmentum* prohibeatur,  
 & *ruptura* præcaveatur.

Itaque aneurysmatibus *cordis*, aut in- Indicationes  
*ternarum*, aut similium arteriarum, quæ in prima spe-  
 curam curatoriam *non admittunt*, adfectis, cie.  
 sedulo omnes illæ causæ vitandæ sunt, Prima.  
 quibus *sanguinis motus* augeatur, & quas  
 in sanis arteriarum aneurysmata *producere*  
 dictum est. Cantus, risus, nixus, ma-  
 gnus corporis & animi motus, potus spi-  
 rituosi, & veneris exercitium, tussis, vo-  
 mitus, sternutatio vehemens omni ratione  
 evitari debent. Hæ enim causæ, prout  
 per se producendo aneurysmati sufficiunt,  
 ita, factum augere, imo disrumpere, &  
 effuso inde sanguine, mortem inferre pos-  
 sunt.

Ob hanc rationem *2do* alvus semper Secunda.  
*libera* tenenda est, ne nixu illo, quo du-  
 ra alvus excernitur, spiritus cohibitus a-  
 neurysmati violentiam inferat.

Tertia. 3<sup>to</sup>. Quia *acrimonia humorum* pariter aneurysmatis sufficiens causa esse videtur, quatenus arteriarum tunicas rodendo eas debilitat, ideo cavendæ sunt omnes illæ causæ, quibus acrimonia in sanguine nasci potest. Cibi acres, falsi, aromatici ideo vitandi sunt, & si quæ in corpore dominetur acrimonia, ea blandis, & sine stimulo agentibus remediis corrigenda est.

Quarta. 4<sup>to</sup>. Ad *pacatum sanguinis circulum* conservandum anodyna sæpius danda sunt, quibus non tantum menti tranquillitas concilietur, sed etiam præcaveantur spasmi, qui in tali casu ab inordinato spirituum motu produci possunt.

Quinta. 5<sup>to</sup>. cum *sanguinis nimia quantitas* tantum ad producendum aneurysma conferat, non minus ad jam facti augmentum, vel rupturam contribuere possit, ideo frequentioribus V. Sect. pro re nata sanguinis quantitatem minuimus.

Sexta. 6<sup>to</sup>. Si tumor aneurismaticus palliative curandus, tali in loco fit, qui non quidem *operationi*, sed *manui* accessum dat, tum fascia, prudenter adplicata, aut adhibita apta machina leniter comprimi debet; qua pressione augmentum non tantum

tum impeditur, sed & is ab omni vi externa præmuniri potest.

Circa hanc autem aneurysma curan- Palliatiuæ-  
 di rationem id præprimis notandum est: curæ 2da  
 eam tantum locum habere posse in aneu- pars.  
 rysmate *externo*; quando namque inter-  
 num aneurysma in aliquo corporis loco  
 extrorsum tumet, quales casus dari, jam  
 monitum est, compressio extrorsum pro-  
 tuberantis sacci non potest non esse peri-  
 culosa, & nociva, quatenus sanguinis in-  
 petu, extrorsum directo, represso, saccus  
 aneurysmaticus magnitudine augetur, vel  
 plane dirumpitur. Unde subita mors,  
 aut saltem omnium symptomatum augmen-  
 tum evenit, aut mors acceleratur.

Verum, non tantum internum aneu-  
 rysma, extrorsum tumens, compressum,  
 periculosum est, sed etiam *externum*, dum  
 illud ita locatum est ab extus, ut, in-  
 trorsum repulsum, ad cavum aliquod re-  
 cedere possit. Atque hæc sunt, quæ cu-  
 ram palliativam concernunt.

Curatio vero *curatoria* triplici ratione Curatoria.  
 perficitur. *Compressione, constrictione, vel*  
*operatione chirurgica.*

Compressio-  
ne.

Curatio, quæ *compressione* perficitur; in aneurysmatibus tantum *cysticis* locum habet, raro in *echymoticis*, seu spuriiis, & id solum tunc, quando illa a causa *externa*, & vel maxime post *venæ sectionem* contingunt, qui ille casus est, in quo locus apertæ arteriæ scitur, & auxilium ferri potest prius, quam magna sanguinis effusio contingat; ubi enim magna jam sanguinis extravasatio facta est, arteria rupta, vel disscissa conprimi quidem potest, sed putredo aperturæ prementis machinæ necessitatem facit.

In *cysticis* aneurysmatibus *compressione* curationem perfectam quandoque viderunt chirurgi, dum illa *recentia*, parva, in tali loco posita fuerunt, ubi arteria, propter subjacens os, *compressionem effugere* non potuit.

Inventæ sunt in hunc casum machinæ, quæ tumorem sanguine elapso crescentem illico continerent, & quandoque curarent.

Quibus machinæ tales ad manus non sunt, illi inposita charta per strata, aut splenis circumducta fascia *compressionem* perficiunt.

In-



Interdum laminam plumbeam, vel auream inponunt, superpositis prius splenis, ut hac ratione compressio æquabilis, & efficacior fieri possit.

Solent etiam aliqui ad compressionem hanc perficiendam emplastra adstringentia adhibere, quale est empl. ad hern. aut cataplasma adstringens inponere, quibus dein splenia sic dicta superimponunt, & fascia firmant.

At vero, ubi aneurysma cysticum adeo magnum est, ut compressioni non obediat, aut aneurysma est ecchymoticum magnum, & ubi effusus sanguis jam coagulatus est, tum sola curationis spes in aneurysmatis operatione est.

Operatio autem hodie *duplici ratione* Operatio. fit; vel *ligata* arteria aneurysmatica, vel Duplex. vero *sine ligatura* perficitur. Utraque harum sequenti ratione instituitur,

Atque primo operatio, quæ *ligata ar-* Cum liga-  
teria fit, sequenti ratione peragitur. Si tura.  
aneurysma ecchymoticum est, adplicata primo machina tornatili, quam Tourniquet vocant, arteria inter cor, & aneurysma conprimitur, quo sanguinis adfluxus inpe-

diatur; tumor tum aneurysmaticus secundum longitudinem aperitur, eximitur inde concretus hærens sanguis, tum eluitur; quo facto foramen, quo arteria aperitur, remissa aliquantulum machina hac tornatili, ut sanguis effluere possit, inquiritur, inventum foramen arteriæ, separatis nervis, quibus ut plurimum sociæ decurrunt arteriæ, filo, acus ope diligenter subducto, supra vulnus, aut, ut alii, magis cauti, amant, supra, & infra ligant. Intermedio inter duas ligaturas loco vulnerata arteria dissecinditur. Integram relinquere placuit Heistero, quo facto linteis siccis vulnus impletur, & ex arte curatur, curando simul, ut primis saltem curationis diebus arteria in decursu per brachium machinæ tornatilis ope compressa teneatur, quo in petus sanguinis in locum ligaturæ parumper infringatur.

Intelligitur sane facile, hoc modo in curatione procedendo, arteriam ulterioribus usibus inutilem reddi; idcirco, operatione peracta, pulsus, qui, sanguine per illam fluente, fit, ubi operatio in arteria brachiali, solitaria, facta fuit, in carpo manus deficit, frigent, per horas, etiam per dies, partes, redeunte demum successive cum pulsu calore, quando laterales

les arteriæ, ligato ramo, per quem omnes vicinæ arteriæ inter se communicare solent, ita adfluente successive sanguine dilatatæ sunt, ut eam quantitatem sanguinis transmittant, quæ ad vivificandas, infra ligaturam, vel compressam arteriam positas partes requiritur.

Dein partes subjectas fomentis aromaticis fovemus, ut sanguinem ad majorem adfluxum invitemus, & simul illas non tantum a putredine præservemus, sed etiam eam in illis flexilitatem conserve-  
mus, qua, serius. citius, influenti sanguini recipiendo apta maneant.

Hæc quidem solum fiunt, dum arteria ligata *major, solitaria* est, qualis utplurimum brachialis est. Accidit tamen quandoque, ut illa in decursu per brachium vario modo in varios ramos abeat.

Tali præsentē arteriæ statu, ligata una arteria, non est, cur multum de vitâ subjectæ partis timeamus; facile calor, & pulsus redit, si quo casu vacarent.

Ast, ubi arteria brachialis solitaria est, & communicans ramus, qualem Cowper, depingit, notabilem amplitudi-

nem non habet, pars infra ligaturam, pulsu omni in carpo silente, friget, donec per eas, quæ adfunt, anastomoses debita sanguinis copia adfluat, quæ dilatandis infra positis arteriis possit sufficere.

Ligato trunco, ramos, adfluente assiduo sanguine copioso, ampliores reddi debere, evidens est, & per eas plus, solito, sanguinis ad partes subiectas adferri, intelligitur.

Attamen quandoque accidit, ut anastomoses illæ adeo parvæ sint, ut nullo modo vivificandis infra ligaturam partibus sufficiat illuc defluens sanguis, quo in casu mors illius partis subsequitur.

Sine ligatura arteriæ, cum constrictione.

Periculum hoc ut evitetur, jam veteres excogitarunt methodum, qua *sine* facta *ligatura* arteriæ vulnus ita claudi possit, ut ulterior sanguinis profusio prohibeatur, & curatio perficiatur.

Alii in hunc finem, arteria, prius compressa, chartam masticatam, in plumaceolæ formam redactam, aut parva splenia, liquore aliquo adstringente imbuta, arteriæ foramini imposuerunt, &, superpositis spleniis pluribus, eousque, ut imple-

pleretur vulneris altitudo, adpositis fasciis firmarunt.

Alii frustillum vitrioli, vel aluminis vulneri arteriæ inposuerunt, eoque similiter firmato, sanguinis effusionem inpediverunt, & occasionem fecerunt, ut, nato in vulnere thrombo, arteriæ vulnus consolidetur.

Ad hoc melius efficiendum Cel. Morand, Chirurgus Parisinus, meliorem methodum excogitavit.

Fungus est, sub nomine *agarici* notus, forma pedis equini, qui, in arboribus, ut: quercu, fraxino &c. natus, vi, sanguinem sistendi se commendat; hujus fungi, externo cortice denudati, frustillum vulneri arteriæ inponitur, dein gradatim aliis fungi hujus frustulis, & spleniis locum illum impleri jubet, donec constrictionem circumductæ fasciæ subiecta læsa arteria experiri possit.

Magna adeo fasciæ adstrictio hic non requiritur, quia fungus ille magnam, & eximiam vim plasticam, qua cum partibus, quibus inponitur, facile, & pertinaciter cohæreat, habet.

Arteria etiam hac methodo non comprimitur adeo, sed fluit semper per illam sanguis, cujus inpetum, adplicata super vulnus per aliquod tempus tornatili machina, infringere oportet.

Quacunque vero mox dictarum methodo procedat operator, nunquam machinæ tornatilis aliquo tempore adplicatio intermitti debet.

Relinquitur iste rerum adparatus, donec, consolidato arteriæ vulnere, adpositus fungus decidat.

Hæc de operatione in curatione aneurysmatis *ecchymotici* instituenda.

Operatio  
cystici.

Dum aneurysma *cysticum* est, tribus diversis modis fieri consuevit operatio.

Fit 3 modis.  
Primo.

Vel enim aperto sacco aneurysmatico, excusso omni sanguine crasso, coagulato, arteriæ vulnere, quod antea dicto modo detegitur, frustillum vitrioli, vel aluminis, vel splenium, vel charta masticata, liquore styptico, vel caustico inbuta, inponitur, quo facto splenia aliqua inponuntur eousque, donec circumducta par-



parti fascia subpositam arteriam compri-  
mat, & vulnus concreseat.

Vel vero cute, intacto aneurysmatico  
sacco, prudenter dissecta, & ab illo dextre  
separata, arteriam aneurysmaticam, remo-  
tis solerter nervis, infra, & supra tumo-  
rem ligant, & in medio inter utramque  
ligaturam dissecunt, & vulnus ex arte  
consolidant;

Secundo.

Bourmanni est hæc methodus.

Arnelius, quod hic operandi modus  
non tantum plus temporis requirat. Sed  
& magnam etiam cicatricem relinquat,  
aliam operandi methodum proposuit.

Tertio.

Jubet ille : adposita prius machina  
*tourniquet*, quod primum in omni opera-  
tione fieri debet, cutim incidere, & san-  
guinem ex tumore exprimere; quo facto,  
arteriam utrinque ligare, reliquamque  
curationem ex arte perficere.

Verum, cum non raro magna sangui-  
nis coagulati quantitas in sacco aneurys-  
matico contineatur, qui in arteriam repri-  
mi non potest, nec debet, methodus hæc  
generaliter usui esse non potest.

Mo-

Morandi methodus , qua proposita , fungo vulneratam arteriam curari posse , diximus , in aneurysmate locum quandoque habet ; ubi videlicet apertura , qua arteria in saccum aneurysmaticum patet , magna non est , quod in illis aneurysmatibus , quæ saccum spurium habent , & vulnerata arteria facta sunt , quandoque invenitur.

Facta sic , quocunque modo , operatione , ad *Symptomata* ea , quæ majora vulnera sequi solent , præcavenda , si æger plethoricus est , vena secanda est , & talia danda remedia , quæ ægro dolores leniant , & inflammationem præcaveant.

Diæta blanda , & animi quies commendanda sunt ; quibus mediantibus ut plurimum felix operationis , si ea non temere , & citra consilium suscepta sit , expectari potest

F I N I S .

---

# THESES PRACTICÆ.

## I.

**P**essime in quavis hæmorrhagiæ specie, eadem exhibentur remedia.

## II.

Hinc in hæmorrhagiis a plethora, sanguinis orgasmo, opiata contraindicantur.

## III.

In his vero, uti & in iis a læsione vaforum internorum per vim externam, aut a pulmonum tuberculis V. S. & antiphlogistica conveniunt.

## IV.

Ligaturæ artuum in delirio, furore febrili, & hæmorrhagiis potens sunt remedium.

## V.

In multis phthyseos speciebus V. S. totusque adparatus antiphlogisticus sæpe mirum in modum juvat.

## VI.

In quibus decantatissima alias antiphthysica non tantum non juvant, sed & obsunt.

## VII.

V. S. pro exigentia rerum repetita, in inflammatoriis optimum cardiacum, tutissimum anodynum.

## VIII.

Egregium etiam subinde est antispasticum, ob metum superventuræ inflammationis.

## IX.

In quibusdam apoplexiæ speciebus de V. Sect. ne cogitandum quidem.

## X.

Datur apoplexia emetico curanda.

## XI.

In casu adsumti veneni emesis, mature excitata, optimum antidotum.

## XII.

In colicis doloribus prima cogitatio de materiæ, morbum causantis, si ejus subsit suspicio, eliminatione esto.

## XIII.

XIII.

Enteritis quoad prognosin fallacissima.

XIV.

Non omnis dysenteriae species eadem medendi methodo curatur.

XV.

Hinc nullum datur specificum antidyfentericum.

XVI.

Sed, pro varietate causæ, illam producentis, methodus medendi quoque variat.

XVII.

Non solum accumulatio muci, sed etiam debilitas fibrarum in glutinoso spontaneo indicat.

XVIII.

Indicata ergo erunt: antiscorbutica cum roborantibus martialibus.

XIX.

Spina bifida semper incurabilis.

XX.

Hydrops a scorbuto lethalis.

## XXI.

Datur hydrops, amaris, & roborantibus curandus.

## XXII.

Acida mineralia in putridis præferenda vegetabilibus.

## XXIII.

In colica pictonum opium omnibus aliis remediis antecellit.

## XXIV.

Cicuta, in- & externe adhibita, in obstructionibus viscerum, & scyrrho egregium prorsus medicamentum.





# E r r a t a.

<i>Pag.</i>	<i>lin.</i>	<i>loco</i>	<i>lege:</i>
25	2	amplias	amplius
26	22	Lancis.	Lancis.
27	2	incredibilie	incredibile
ib.	17	requireretur	requirerentur,
28	2	angetur	augetur
31	22	mojor	major
32	5	ado	adeo
36	6	sanguivuis	sanguinis
ib.	19	inquirendo	inquirenda
39	13	spurimum	spurium
44	25	retrocedet	retrocedat
50	5	commaucationem	communicationem.
ib.	22	durntionis	durationis
51	8	gsadu	gradu
55	19	perfusio	profusio
56	6	caric	carie
ib.	13	videtus	videtur
b.	18	oon	non
b.	23	fit	fit
4	16	ilia	illa

IB. Reliquos errores minoris momenti, aut  
 fors ob celeritatem impressionis prætervi-  
 sos B. L. ipse corrigat legendo,



deijne Liefde

21/2

de wachter van de

indien

meer - Eijnde Tijds neder  
Hollands vol 11

Alois Stzel

2x

1. Morbo hyperbolicus

vinoban

aus: Egentl. Stf. und Hollen  
vol. II

ja Bapt. Herthas

Stf.

2. Hemorrhoiden

vinoban

aus: Egentl. Stf. und Hollen  
vol. II